

"Nice mannn!!!" "They like us!!!" Baba Charlie a bay laga nos

Ronald Manuela, conoci pa mayoria di hende na Aruba como **"Baba Charlie"**, popular na Aruba, Corsou, Bonaire, Islanan Ariba, principalmente St. Maarten, Merca y Hulanda, como figura di Radio, y farandula como MC, a cera su wowonan diadomingo mainta na **Dr. Horacio Oduber Hospital**.

Ronald Manuela, cu e aña ki lo a cumpli 70 aña, conoci como **Baba Charla** pa mas di 35 aña a deleita oyentenan na **Radio cu su programanan di Calypso**, y ta wordo considera como e **locutor cu a pega musica di Calypso na emisoranan**. El a cuminza esaki **usando un voz cambia, na Papiamentu y Ingles**, keda experimenta y yega na e **imitacion di ingles di islanan caribense**, mescla cu **ingles di Trinidad**, y a logra e **formula di Baba Charlie**.



Hopi hende semper a kere cu e ta di **Trinidad** of di cualquier di e islanan caribense, siendo cu e **ta naci y cria, y creci na Aruba**. El a pasa na **Radio Carina y na Radio Galactica** cu su programa y te recien ainda fanaticonan di calypso tabata pidi pa e sali for di retiro y cuminza atrobe cu su programa. Hunto cu mi persona, nos a transmiti varios festival di calypso y roadmarch hunto, ademas otro actividadnan cultural of musical.



Cu organizacion **JUBA** nos a organiza **conciertonan di steelband** cu participacion di varios steelband hunto riba un anochi, y na **San Nicolas** tabata cu **11 steelband** riba un anochi. Tambe varios anochi di **concierto cu calypso**, entre otro



anochi di **musica di Sparrow y e Socalicious** cu nos a trece Aruba e **cantante conoci como Rey di Calypso Mundial, Mighty Sparrow** cu a actua gratuitamente den varios show riba nos isla, hunto cu cantantenan di calypso manera **Mighty Whitey, Mighty Cliffy, Rudolph Gibbs, Mr. Culture Robert Maduro, Mighty Reds, Rafael Flanders** entre otro.

Baba Charlie tabata un maestro di ceremonia popular y riba nos isla el a dirigi shownan den tur distrito y na hotelnan ademas. Na varios hotel e tabata popular tambe como **"cantador di bingo"**.

Nos a colabora na Radio cu otro. Di e **25 añanan cu mi a presenta Bon Bini Festival**, mi a presenta esaki mas o menos **10 aña cu Baba** tambe. Nos a bira amigo grandi di otro, y mi sa bisa cu amigonan manera **Baba Charlie** ta masha schaars na mundo.



Ronny tabata un persona dificil pa hopi hende. **Dificil** pasobra no ta kende cu ta e tabata acepta como amigo y ora bo ta amigo, bo tin cu sa con pa anda cu su caracter di **"pain in.....!"** manera un persona a laga sa recién durante su ultimo oranan.

E tabata masha fiel na su amigonan y conocirnan, pero no tabata tolera nada di inhusticia contra dje ni contra otronan. Pa esey, su **"pain in"** ta bin aden mes ora pasobra e ta cla mes ora cu contesta pa bo pa ponebo na bo lugar. E tabata **"terco"** tambe na hopi ocasion, y maske kico bo haci **bo no ta gana, pasobra e ta keda para firme** riba loke el a pensa of expresa. Ta esnan cu conoce hopi bon sa cu esaki ta masha normal di e personahe cu **Baba Charlie** tabata.

E tabata un persona cu curazon grandi y ta laga tur cos para pa bay duna man na su amigonan y cono-

cirnan cu mester di un yudanza, sin importa e ora cu a tuma contacto cune. **Semper por a conta riba dje**, si el a duna su palabra pa haci algo pa otro y tabata cumpli. Cumpli no ta 100 porciento corecto tampoco, pasobra cu **"holoshi"** e no tabata mucho bon amigo. **Su ora semper tabata varia 5 pa 10 minuut**, pero tin ora hasta na mey ora. E bon ta cu e tabata conoci **(den su terkedad)** di semper tin un excusa aceptabel. Tur hende ta acepta hari, y a lubida e yegamento laat.

Mas o menos **5 aña pasa el a cuminza haya problema di pulmon**, y den transcurso di añanan el a haya su mes na **Colombia y na Corsou** tambe na **Aruba**, na varios ocasion den hospital. El a biba cu su **"ups and downs"** di e problema aki, te cu **mas o menos 2 siman pasa el a bolbe drenta hospital** y a keda bao di tratamento te cu su fayecimento diadomingo mainta.

Diasabra mainta despues cu el a ricibi **Santa Oleo**, un di su amigonan a tene un discurso cortico den cual el a mostra riba esnan presente, **net e personanan mas yega na Ronny**, esnan cu e tabata tin como amigo y ademas su familiarnan presente y a laga sa di ta **contento di mira e 12 apostelnan hunto cu Baba**, manera un despedida di esnan cu mas a stim'e y cu mas el a stima.

Mi ta corda ainda lo ultimo cu el a bisami tabata: **"ainda nan no a yega aki banda cu e reconocimiento di dia di inauguracion di Muraya di fama na Aruba Carnival & Entertainment Village"**. A expresa e anochi ey cu e siman ey mes lo bay hospital pa entrega e reconocimiento na Baba, y el a cera su wowo pa semper sin a mira esaki durante su bida. Usando fotonan di musico **Franklin Arrindell y P.R. di Departamento di Cultura Stan Dabian** mi no por keda sin manda mi palabranan di condolencia profundo na tur su familiarnan y e personanan cu mi sa cu ta su amigo y amiganan cera, cu mescos cu mi, lo haya falta hopi di **"Nice Man!!"** **"They like Us!!"** **Baba Charlie**.

Juby Naar